

## Pindaan Peraturan Kesihatan Antarabangsa perlu hormati prinsip kesaksamaan

Rafidah Mat Ruzki - Mei 24, 2022 @ 6:58pm  
fidahruzki@bh.com.my



KHAIRY Jamaluddin

PUTRAJAYA: Malaysia berpendirian sebarang pindaan terhadap Peraturan Kesihatan Antarabangsa (IHR) perlu menghormati prinsip kesaksamaan, kebertanggungjawaban dan ketelusan serta proses kedaulatan negara anggota.

Menteri Kesihatan, Khairy Jamaluddin, berkata tatkala semua negara anggota perlu dipertanggungjawab untuk mendedahkan maklumat penting membabitkan kepentingan kesihatan awam, perlu juga ada pendedahan terhadap hak cipta intelek dan pengetahuan pembuatan vaksin, diagnosis dan terapi.

Bagi tujuan itu, beliau berkata, mekanisme perlu diwujudkan untuk pengagihan sumber yang diperlukan ketika pandemik dengan adil dan saksama.

"Kita seharusnya membina semula sistem yang lebih baik, tetapi dengan kesaksamaan supaya tiada negara yang ketinggalan. Pepatah Melayu menyebut, berat sama dipikul, ringan sama dijinjing. Kita perlu bukan saja bersama-sama berkongsi kesakitan tetapi juga berkongsi penawar dan pemulihan," katanya.

Beliau berkata demikian ketika menyampaikan kenyataan negara pada Perhimpunan Kesihatan Dunia Ke-75 yang sedang berlangsung di Geneva, Switzerland, hari ini.

Khairy yang juga Naib Presiden Perhimpunan Kesihatan Dunia Ke-75, berkata kesihatan dunia terus merosot dan kini semua pihak menyedari kesihatan global berkait rapat kesihatan manusia sejagat.

Katanya, perubahan iklim memberikan kesan buruk kepada bekalan makanan.

Selain itu, beliau berkata, pandemik penyakit zoonotik seterusnya bukan lagi sekadar andaian, sebaliknya hampir boleh berlaku.

"Penyakit tropika seperti denggi yang memberi kesan terhadap negara seperti negara saya, kini juga menjadi kebimbangan di negara lain, ekoran pemanasan global.

"Namun, masih ada lagi harapan. Malaysia menyokong cadangan untuk pembiayaan yang mampan yang menjadikan Pertubuhan Kesihatan Sedunia (WHO) sesuai dengan tujuan itu.

"Kami menyokong reformasi terhadap kerangka kesihatan antarabangsa yang akan mengelakkan kegagalan moral, ketika kita berdepan dengan COVID-19," katanya.

Pada masa sama, Khairy turut mengajak Menteri Kesihatan dan pegawai tertinggi yang menghadiri perhimpunan itu untuk menjadi suara keadilan sosial dalam kerajaan masing-masing, termasuk untuk memperjuang perlindungan kesihatan sejagat.

Katanya, pengorbanan petugas kesihatan sepanjang pandemik perlu dihargai dengan mendesak kepada penyaluran sumber yang diperlukan untuk membina sistem kesihatan yang anjal, serta supaya kesihatan dilihat sebagai satu pelaburan dan bukannya satu perkara yang diberikan peruntukan, selain menjaga dengan lebih baik kesihatan fizikal, mental serta semangat rakyat masing-masing dan bumi yang dikongsi bersama.

Terdahulu, ketika sesi mencelah, Khairy berkata, sepanjang pandemik yang berlaku ini, jurang dapat dilihat dalam IHR yang masih boleh diperbaiki dalam menguruskan pandemik lain dan ancaman global pada masa depan, terutama membabitkan kesaksamaan.